

Durante discurso di fin di aña

Minister President Eman ta gradici comunidad pa e confiansa

ORANJESTAD – Prome cu aña a caba Prome Minister Mike Eman a gradici comunidad pa e confiansa otorga na su gabinete cual el a haci durante su discurso di Fin di Aña. Un confiansa grandi cu a nifica un cambio di rumbo. Un cambio cu tabata necesario si mira bek con Aruba tabata na fin di 2009.

Cuatro aña pasa e situacion na Aruba tabata completamente otro ora cu Eman a dirigi su mes na pueblo di Aruba na Bispo di Aña 2010. E dolor y e inkietud tabata uno grandi, segun Prome Minister.

Aruba tabata un isla bandoma, un isla den decadencia. E relacion cu Reino Hulandes tabata bou hopi tension, tabata tin un discordia grandi y polarizacion tabata reina den tur skina. Esaki tabata e situacion e



tempo ey. E retonan cu e gobierno nobo a haya su mes confronta cu nan tabata inmenso. Den su discurso di cuatro aña pasa Eman a bisa

pueblo cu t'ey pa tur hende y cu por conta riba dje. Cu hunto lo lucha te na momento cu pueblo recobra su felicidad y Aruba henter ta

contento atrobe.

Cu e compromiso fuerte den mente mandatario dicitado a lora manga di camisa

y a cuminsa traha di dia y anochi, casi sin paracion. E compromiso haci na pueblo tabata e fuente di energia cu tabata traha cun'e, poniendo luz unda tabatin scuridad y inicio di felicidad unda tabatin tristesa. A dedica curason y alma riba e trabou cu mes-ter a wordo haci.

E trabou duro y incansabel a duna su frutanan. Cuatro aña despues e cambio positivo ta bisto tur caminda. Centro di ciudad a pasa den un metamorfosis completo, mescos ta e caso cu bario, scol y edificionan gubernamental. Esaki ta parti di e tantisimo resultadonan.

Inversionistanan a haya e caminda bek pa Aruba y esaki ta wordo traduci den un economia creciente. Den e cuatro añanan cu ta bin e compromiso grandi cu Pueblo y Pais ta sigui. □